

Midament en la direcziun da l'anr

■ **(anr) Jon Domenic Parolini dat giu suenter 19 onns il presidi dal cussegl da fundaziun da l'anr. Sia successiun tar l'Agentura da novitads rumantscha (anr) surprinda Martin Gabriel da Glion. Cussegliaer naziunal Martin Candinas daventa nov commember dal cussegl da fundaziun.**

La mesadad da matg da quest onn è *Jon Domenic Parolini* vegnì elegì cun in resultat grondius en la regenza grischuna. En vista a sia nova sfida politica, la quala el surprinda per proxim schaner, dat el giu il presidi dal cussegl da fundaziun da l'Agentura da novitads rumantscha. «L'agentura da novitads en lingua rumantscha ha passentà durant sia istorgia da 19 onns era temp turbulents, ma interessants», declera il commember fundatur da l'anr Parolini. «Grazia a l'engaschament permanent dal cussegl da fundaziun per in'indipendenza structurala e dal manaschi da l'anr da ses clients è ella daventada durant quests 19 onns in partenari fidà da la pressa rumantscha. Il consum dad infurmaziuns digitalas che s'intensivescha pli e pli ed il giavisch da stgaffir entaifer l'anr in servetsch da lingua taliana vegnan ad esser las sfidas futuras da l'anr», uschia Parolini plinavant.

A chaschun da sia ultima sesida dals 18 da december 2014 ha elegì il cussegl da fundaziun da l'anr il vicepresident d'enfin qua *Martin Gabriel*. Gabriel che ha 52 onns è manader da la chanzlia da la citad da Glion ed enconuscha bain era la bransch da medes da massa. Durant ils onns 1988 fin 2006 ha el lavurà sco schurnalista tar Radiotelevisiun Svizra Rumantscha (RTR). Enpli è vegnì elegì il cussegliaer naziunal *Martin Candinas*, sco represchentant da la Pro Svizra Rumantscha, en il cussegl da fundaziun da l'anr.

Idioms e rumantsch grischun

L'Agentura da novitads rumantscha è vegnida fundada il zercladur 1996 ed ha cumenzà cun sia lavur operativa a l'en-

tschatta schaner 1997 cun la publicaziun da l'emprim exemplar da la gasetta da di La Quotidiana. L'agentura da novitads ha la finamira da sustegnair ils medes da massa rumantschs – en emprima lingua la pressa. L'anr furnescha als titels stampads La Quotidiana, «La Pagina da Surmeir» e «Posta Ladina» sco era als medes electronics rumantschs mintga di contribuziuns en furma da texts e fotografias. Questas contribuziuns vegnan scrittas tant en tut ils idioms rumantschs sco er en rumantsch grischun. Ils idioms vegna utilisads per las novitads localas e regiunalas, la lingua da scrittira rumantsch grischun vegn utilisada sche la novitad pertutga tut la cuminanza da lingua.

Senza anr nagina La Quotidiana

Cun sia gronda purschida s'ha l'anr etablida sco ina pitga impurtanta dals medes da massa rumantschs, surtut da quels stampads. «Senza las prestaziuns da l'Agentura da novitads rumantscha na fissi pussaivel d'edir La Quotidiana en sia furma actuala», è Parolini persvas. «Dapi la surprindida dals redactors da La Quotidiana il matg 2009 procura l'anr per la publicaziun quotidiana da la gasetta. Er ils auters dus products stampads rumantschs «Posta Ladina» e «Pagina da Surmeir» fissan senza il sustegn da l'anr fermamain periclitads. Perquai», uschia il cussegliaer governativ futur plinavant, «èn ils servetschs da l'agentura da novitads ina da las mesiras las pli impurtantas e cun il pli grond effect per il mantegniment e la promoziun da la lingua rumantscha. Cun sias structuradas satiglias po l'anr accumplir da maniera effizienta ils giavischs surtut dals clients da medes stampads.»

Collavuraturs stabels e libers

Operativamain vegn l'anr manada da *Guido Jörg*. L'Agentura da novitads

dat lavur a 13 collavuraturs e collavuraturs cun in volumen dad 840 pertschients da piazza da lavur. Ultra da quai èn diversas collavuraturs e

collavuraturs libers en Surselva, en la Val Schons, en Engiadina sco era giu la Bassa actives per l'anr. Plazzas da lavur sa chattan en la redacziun cen-

trala a Cuira sco er a Mustér, Cumpadials, Trun, Vuorz, Sagogn, Sur, Zernez, Scuol, Zillis, Uznach e Berna.



Martin Gabriel, il successur da Jon Domenic Parolini, a la testa dal cussegl da fundaziun da l'anr.